


CELEBRACIÓN EN OS COTOS (na casa)

21 – 22 de novembro do 2020

CRISTO REI DO UNIVERSO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO EN FAMILIA

SAÚDO DE BENVIDA

🎵 *Unha xuntanza de amor*

Celebrante:

Benvidos sexamos todos a esta celebración. Reunímonos para celebrar a nosa fe en familia e na compañía de Xesús a quen proclamamos Cristo Rei do Universo. Facémolo no nome do Pai e do Fillo e do Espírito Santo.

Neste último domingo do tempo litúrxico a igrexa remata o seu ciclo da vida de Xesús coa súa proclamación como peñor e cumio de toda a creación.

El é o noso rei, pero a súa realeza ven demostrada polas súas palabras e os seus feitos, que fomos lembrando ao longo do ano litúrxico.

O seu reino é o reino da xustiza, do amor e da paz. E neste reino soamente teñen cabida aqueles que tratan de facer que a xustiza, o amor e a paz sexan unha realidade no mundo que vivimos.

Mentres teñamos situacións como as que vemos estes días en Arguineguín (Canarias) o reino de Xesús non se pode facer realidade.

Comecemos a celebración atentos á nosa responsabilidade coas persoas que sofren o desamparo e abandono mentres nós vivimos acomodados.

ACTO PENITENCIAL E COMPROMISOS

Celebrante: *Moitas veces vivimos alonxados da realidade e miramos para outro lado para non comprometer nos e dar a nosa opinión. Se en verdade queremos facer o Reino de Xesús na terra temos que pedir perdón:*

Monitor/a

➤ Ti que es Rei amando a todos sen facer distincións, perdoa as nosas discriminacións

Señor, ten piedade de nós

➤ Ti que es Rei e convidas a todos a sentírmonos irmáns, perdoa os nosos odios e enfrontamentos

Señor, ten piedade de nós

➤ Ti que es Rei facendo comunidade e acollendo a todos, perdoa as nosas desunións e egoísmos

Señor, ten piedade de nós

Celebrante: *Deus todopoderoso teña piedade de nós e dos que teñen lugar no noso corazón e nosa vida. Con cariño lembrámonos hoxe da nai do noso amigo Lence. A todos o Señor nos conceda o perdón e nos leve á vida eterna. Amén.*

Celebrante: *Presentámoslle ao Pai os nosos desexos de formar parte do Reino xunto con toda a creación, e renovar a nosas forzas para darlle gloria e louvalo en comunidade.*

(silenzo)

Deus, noso Pai, no teu Fillo benquerido, Rei do universo, quixeches facer novas todas as cousas.

Fai que todas as criaturas, liberadas da escravitude do mal, proclamemos a túa gloria e cantemos sempre a túa louvanza.

Pedímoscho por Xesucristo, Rei na nosa vida, e que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s)

Monitor/a:

San Paulo móstranos a vitoria de Xesús e a súa unión co Pai.

Xesús, no Evanxeo, móstranos o xuízo de Deus e como seremos chamados a dar contas das nosas obras de amor cos irmáns: “tiven fame, tiven sede...”.

Como o estamos a facer nós? Podemos pensar que seremos chamados benaventurados?

LECTURA DA PRIMEIRA CARTA DE SAN PAULO AOS CORINTIOS

Irmáns e irmás:

Cristo resucitou dos mortos, coma primicia dos que dormen. Porque xa que por un home entrou a morte, tamén por un home chegou a resurrección dos mortos. Igual que todos morren por Adam, así tamén por Cristo todos revivirán. Pero cada un no seu intre: primeiro, Cristo; logo, no Día da súa Vinda, os que sexan de Cristo; despois será a fin, cando lle entregue o Reino a Deus Pai, unha vez destruído todo Principado, toda Potestade e toda Dominación. Porque é necesario que El reine ata que poña a todos os seus inimigos por debaixo dos seus pés. A morte será o derradeiro inimigo destruído.

E cando lle teña todo sometido, entón tamén o propio Fillo se someterá a quen lle someteu a El todo: para que Deus sexa todo en todo.

Palabra do Señor

♪ *nº50 Na tardiña baixa da vida* SALMO

(en pé) Leccionario I A páx 287 Mt 25, 31-46 VANXEO

PROCLAMACIÓN DO SANTO EVANXEO SEGUNDO MATEO

Daquela díxolles Xesús aos seus discípulos:

Cando veña o Fillo do Home na súa gloria e todos os anxos con el, sentará no seu trono glorioso. Diante del xuntaranse todas as nacións; e separará uns dos outros, como xebra o pastor as ovellas das cabras. Entón dirá o Rei a uns:

"Vinde, benditos do meu Pai; recibide a herdanza do Reino preparado para vós desde a creación do mundo. Porque tiven fame e déstesme de comer; tiven sede e déstesme de beber; fun forasteiro e acolléstesme; estiven espido e vestístesme; enfermo e visitástesme; estiven na cadea e viñéstesme ver".

Entón preguntaranlle os xustos:

"Señor, ¿cando te vimos famento e che demos de comer; ou sedento e che demos de beber? ¿Cando te vimos forasteiro e te acollemos; ou espido e te vestimos? ¿Cando te vimos enfermo ou na cadea e te visitamos?"

O rei contestaralles:

"Asegúrovos que canto fixestes cun destes irmáns meus máis pequenos fixéstelo comigo".

E diralles logo aos outros:

"Arredade de min, malditos; ide para o lume eterno preparado para o Satán e para os seus anxos.

Porque tiven fame e non me destes de comer; tiven sede e non me destes de beber; fun forasteiro e non me acollestes; estiven espido e non me vestistes; enfermo e na cadea e non me visitastes".

Eles replicaralle:

"Señor, ¿cando te vimos famento ou sedento, forasteiro ou espido, enfermo ou na cadea e non che acudimos?"


El responderalles:

"Asegúrovos que canto deixastes de facerlle a un destes máis pequenos, deixastes de mo facer a min.

Daquela irán estes ao castigo eterno, e os xustos á vida eterna".

Palabra do Señor

(sentad@s) gardamos uns instantes de silencio para acoller a palabra no corazón



O evanxeo de hoxe é toda unha escola da vida. Estamos moi acostumados a mirar polo que nos atinxe a nós, pero con Xesús estamos convidados a abrir a mirada.

Que ten fame, e de que?, Quen ten sede e de que?:

- Tena o vello que vive só, tena a nai que ten que criar a soas ao fillo, tena o que busca traballo cada día, tena a terra e a natureza maltratada, tena o mozo que non sabe a que adicará a súa vida, tena o que vive nun rural demasiado esquecido, tena a muller que espera agarimo e respecto e non violencia, ...

Quen está enfermo, ou quen é estranxeiro?

(en pé)

PROFESIÓN DA FE

Celebrante: Neste encontro familiar queremos formar parte do Reino de Deus e por iso damos resposta coa nosa fe dicindo:

Creo, Señor, pero aumenta a miña fe

Monitor/a

Credes en Deus Pai e Nai,
que nos enche do seu amor para facelo realidade nos esquecidos e empobrecidos?

Creo, Señor, pero aumenta a miña fe

Credes en Xesús,
que nos convida a vivir mirando sempre polos demais, cos ollos cheos da tenrura e do agarimo?

Creo, Señor, pero aumenta a miña fe

Credes no Espírito Santo
que alenta a colaborar construíndo unha sociedade que se preocupa dos famentos, dos sen casa, dos enfermos, dos cansos?

Creo, Señor, pero aumenta a miña fe

Credes na igrexa da casa,
comunidade que necesita das nosas mans, dos nosos esforzos, para sermos cribles ao procurar irmandade: co refuxiado abandonado, coa muller maltratada, co rural esquecido, cos que non contan para ninguén?

Creo, Señor, pero aumenta a miña fe

ORACIÓN UNIVERSAL

Celebrante: Por medio de Cristo, Rei do universo, presentemos a Deus Pai as necesidades da Igrexa e do mundo enteiro dicindo con fe:

Cristo, Rei do universo, escóitanos

Monitor/a

- ✓ Cristo, Rei do universo, concédenos como igrexa seguir facendo realidade o evanxeo nas palabras e nos feitos que falan de caridade, oremos
- ✓ Cristo, Rei do universo, que rexeitas calquera outro poder que non sexa o do amor, maniféstalle aos pobres e aos sinxelos que estás sempre do seu lado, oremos
- ✓ Cristo, Rei do universo, que reinas no corazón das persoas, concédenos a todos vivir ao construíndo o teu reino de paz e igualdade, oremos
- ✓ Cristo, Rei do universo, aléntanos no esforzo por facer da sociedade un lugar no que todos sexan tratados con dignidade, oremos
- ✓ Cristo, Rei do Universo, fai que os enfermos e os que están a sufrir as consecuencias económicas da pandemia teñan o noso apoio e axuda responsable, oremos

Celebrante: *Escoita, Señor, a oración que a túa igrexa che presenta con humildade. Pousamos tamén nas túas mans a nosa oración lembrando a Lucía, a nai do noso amigo Lence. Pedímoscho por Xesucristo noso Señor. Amén*

3.- OS SIGNOS DA COMUNIÓN CON DEUS EN FAMILIA

NOSO PAI

Celebrante: *A Deus Pai presentámoslle agora a nosa oración como nos ensinou Xesús, Rei do Universo, louvando e pedindo:*

NOSO PAI ...

SIGNO DA PAZ

Celebrante: *Todos somos capaces de mirar polos demais, somos capaces de poñernos no lugar dos outros. Na tardiña baixa da vida han examinarnos de canto fomos capaces de amar, se demos de comer, se acollemos, se visitamos. Cada vez que o fixemos fixémoslo co mesmo Cristo.*

NON COMULGAMOS PERO ESTAMOS EN COMUNIÓN

Celebrante: *Xesús, Rei do Universo, conta con nós para que poidamos construír o seu Reino xa aquí na terra, o seu Reino de xustiza, de amor e de paz, compartido por todos, sen distincións de persoas e vivindo conforme ao Evanxeo. Sintámonos ditosos por estar convidados a seguir estas pegadas que nos deixa o Señor.*

 *Na tardiña baixa da vida*

4.- AVISOS E DESPEDIDA

ORACIÓN FINAL

Celebrante:

Oremos:

Señor, nesta celebración, déchesnos o evanxeo como ferramenta coa que vivir e dar vida.

A nós, que temos a honra de seguir os pasos de Cristo, Rei do Universo, concédenos vivir eternamente con El no reino dos benaventurados que saben amar en verdade.

Pedímoscho a Ti que vives e reinas por sempre eternamente. Amén

Xesús, fiándose do Pai, entregou a Vida e amosounos que o seu Reino de amor, xustiza e paz é agora a nosa responsabilidade.

As palabras coas que hoxe temos rezado fanse vivas na tolerancia, no respecto, na igualdade e na loita contra a violencia de xénero.

Deámoslle unha man ás persoas e aos pobos que soñan con un mundo mellor, con un Reino de Deus.

***Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén.***